

清季外交史料卷十一

黃巖弢夫王彥威輯

男希隱亮編

孫孝章敬立校

使英郭嵩燾奏英外相調處喀什噶爾情形摺

出使英國大臣郭嵩燾奏爲英外相調處喀什噶爾情形事竊臣抵倫敦後隨有喀什噶爾使臣賽爾德相踵而至接晤英國爵紳多爲關說英外部丞相德爾比屢遣威妥瑪道意旋據照會章程三條其蓄意保護喀什噶爾已於四年前定立條約互相遣使駐紮觀其意旨尤懼俄羅斯侵有其地謀爲印度增一屏障是以護持尤力臣因來文三條內

推廣言之要以四款尤歸重在令繳還毗連北路及前後藏各城使西路聲氣不至中梗臣熟籌西域情形有不能不爲皇上一陳之者查乾隆年間戡定西域回疆自吐魯番以西設立東西八城而於哈密六千餘里之地設綠營兵五千七百餘名騎兵五百餘名皆由伊犁烏魯木齊更調輪戍謂之換防之兵駐防將軍都統皆在北路分設參贊大臣而回疆遠出伊犁之西僅統於一參贊似當時廟謨深知回民反覆難馴一以羈縻視之更不復加意經營是以北路興屯二十四萬餘畝南路回疆尙不及五分之一簡法輕徭與爲休息無使叛亂而已及道光初回疆之變密諭將軍參贊籌議西四城可否仿土司分封之例聽從管轄當時廷臣無敢主其議者然亦足見回疆無足經營列聖之心後

先符合然自乾隆以後回疆數變皆倚浩罕爲聲援道光初平定張格爾即有浩罕安集延入寇之事論者謂西域回民即有變亂無足深慮可慮者浩罕安集延逼近回疆必爲邊患道光以後增添防兵其意實在於此是近年俄古柏佔據西域各城其幾已兆於數十年前非從前回疆一時蠢動可比又以逼近英國所轄之五印度傾心結納資其保護似應乘其調處之機安定章程以爲保境息兵之計臣請言其利病約有六端西洋公法有保護立國之例比利時併於荷蘭法人護之遂自立國葡萄牙併於日斯巴尼亞英人護之亦自立國今英國猶以調處爲義奉中國以建置小國之權正宜援據西洋公法劃定疆界杜其侵擾而亦可乘此機會令其繳還一二城以自輸款解和息兵尤

爲有名此一利也漢唐邊地分別北庭西域二者即今天山南北兩路
漢建校尉唐置都護降胡雜虜因叛立國興廢頻仍無損國威即我朝
喀爾喀四部土扈爾特一部亦常給地游牧使自爲部落與其窮兵糜
費以事無用之地而未必即能規復何如捐以與之在中國不失爲寬
大之名在喀什噶爾彌懷建置生成之德揆之列聖安置喀爾喀哈喇
沙之成規亦能曲合此二利也回疆各省爲俄古柏佔據者其勢尤有
所統一北路回民乘亂擾佔據城池各立名號以臣愚意度之俄古
柏跨有各城聲勢方張各路回民未有不假其名號以求逞者是以與
英國外部丞相德爾比酌擬四條以爲南北兩路稱亂十餘年大率皆
回民也無論俄古柏所轄與否皆責成解散庶幾一舉而兵戈可息是

捐西域數城之地而南北兩路數千里皆可設法撫綏不至運兵轉餉
爲累無窮此三利也俄古柏侵據西域結納四鄰到處通商與英國通
商已逾十餘年即西歷一千八百六十八年也俄國通商亦及六年即
西歷一千八百七十二年也其根柢盤固已可概見及此時允准立國
亦可與俄羅斯明定章程交相犄角以爲鞏固邊防之計此四利也臣
聞關外地土饒沃甚於內地英人亦以該處通商之利力護喀什噶爾
中國收取其地百有餘年未甚一加顧惜河磧險遠聲氣阻隔即各城
土產運入內地者甚少因查西洋電報及機輪舟車之利皆創自英國
各國並仿行之臣見土耳其波斯日本各使臣皆隸亞細亞者常相對
慨歎言天地之精英聚於歐羅巴一洲勉力學之常苦不逮日本一經

通商即仿製電報甫及七年西洋諸法次第備舉土耳其使臣言二十年前出使法國初見電報即請其國仿爲之土耳其始得西洋製造電報之法試行之以爲利以次及各種機器及兵法及學館而後及火輪車並及一切政教云爲皆近三四十年事是以至今猶能與俄羅斯相持力戰非是則坐困矣臣詢以土耳其用法極嚴見之各國記載該使臣言此三十年以前事今所行並西法也中國士大夫未易驟曉關外各城地曠人稀足資規畫應及此時消弭兵端即以舉行電報及火輪車爲善後之策招募內地商民及回民之富者令其捐資製造而官爲之經理居積轉運有所憑恃貧民逐利易以謀生富者自護其利源必不肯輕易從亂各城聲息畢達如在咫尺商賈百貨到處流通十數年

後關外各城盡成都會即可漸次推行其法於內地臣又查關外設官階級較少一切疏節闊目與內地情形絕異趁此大亂初平舉行乾隆中保舉邊臣之例所設辦事領隊各官慎選壯年有志氣而官品較卑者補授加以鼓舞獎勵之功必可一收其效此五利也現在辦理西域軍務專恃一左宗棠其年已六十有六而軍務茫無了期諸臣威望已不能逮又皆不習邊事不獨統兵之大員難爲接代即辦理善後事宜亦須老謀深算經畫久遠及此時與喀什噶爾解和休兵使左宗棠得免徵兵轉餉之煩亦卽所以保全功臣而令與俄古柏議定疆界籌辦善後事宜亦必能酌古準今規國家久遠之計此六利也臣於關外情形本非所知遠處海外數萬里並無書史案卷可備檢查又以交涉邊

防大局尤有非人所敢言者臣亦豈敢冒昧上陳徒以英國屬意調停其勢不能拒而不納竊計張格爾以一回酋寄居浩罕崛起稱亂用兵至七八年而始定其時國家方盛府庫豐盈猶且兵敝於外財殫於中今俄古柏氣象規模迥異張格爾即使窮極兵力收復東西各城而安集延逼處蔥嶺不能盡徙其人民而兼取其地則邊患更無窮期夫經國者規久遠主兵者急事功是以督兵大員無議撫之理惟恃朝廷權衡緩急輕重秉成算以宣示機宜而後將帥之威伸朝廷之恩乃深入遠人之心使俯首而聽約束凡臣所言皆審量國勢所及與爲利之遠且大者略爲舉其大綱至於節餉息兵關係本原大計人所共知臣更不敢深論伏乞敕下陝甘督臣左宗棠體察情形斟酌核辦並鈔錄臣

照覆德爾比文件恭呈御覽四者皆關繫緊要而於劃分疆界及兼籌北路軍務兩條尤爲切緊應懇並敕左宗棠一體查照辦理謹奏光緒三年八月十三日奉旨

使英郭嵩燾奏喀什噶爾勦撫事宜請飭左宗棠斟酌

核辦片

附上諭

郭嵩燾片 再喀什噶爾一案英國外部丞相德爾比照會調處已經多日威妥瑪言之尤力臣前屢見新聞報敘述西路艱難情形深慮大軍出關餉運不繼英俄諸國又已與之通商其勢足相抗拒得此轉旋之機或可力籌善後以弭邊患於國家體制亦尙無損是以具摺陳明候其外部承允一切卽行發遞初七日新聞報忽稱俄古柏病歿於古

拉爾地方其子古里裨格襲立旋據世爵斯丹累弗賽斯來傳喀什噶爾使臣賽爾德之言云此尙屬謠傳卽俄古柏死其子亦有能名所有傾心歸服中國之處一依前議辦理而據德爾比之意欲飭署理公使傅磊斯前赴總理衙門會議弗賽斯亦擬來京調處臣以喀什噶爾應撫與否宜由總理衙門請旨辦理而其辦理之法必應由督兵大臣左宗棠審度情形劃分疆界無由總理衙門懸擬之理並告以弗賽斯當出關與左宗棠會商不當前赴總理衙門所議粗有端倪惟西路軍務情形此間一無所聞能乘俄古柏冥殛之時席捲掃蕩當不出數月之內或尙有阻滯及時議撫亦可稍省兵力以爲消弭邊患之計本日見新聞報喀什噶爾使臣遂已回國外部議覆四條臣亦必不聽其翻駁

而由西洋函達中國皆用電報朝發夕至臣具摺到京常在兩月以後恐傳磊斯據以爲言於臣所議條款朝廷尙未知其詳總理衙門亦難於置對此間外部回覆文件速則半月遲或數月是以依照與外部原議先行具奏可否諭飭左宗棠體察關外情形以制勦撫之宜一面將現在進兵事宜是否能操成算趕緊覆奏庶使總理衙門於西路勦撫大局及臣在倫敦辯議各情熟悉於心以爲臨時應付之資如幸西路軍務成功有日不獨此摺可置不論卽英國派員調處一節亦必自行中止一切皆非臣之愚所能遙揣也謹奏光緒三年八月十三日奉上諭郭嵩燾奏英人照會喀什噶爾事宜並傳聞俄古柏病歿各摺片據稱英國德爾比屢遣威妥瑪爲喀什噶爾調處照會章程三條意在護

持帕夏又聞喀什噶爾俄古柏病歿於古拉爾地方等語該侍郎所奏於新疆南路軍務得手情形自尙未悉着左宗棠將該侍郎所奏體察情形斟酌核辦原摺片單各一件着鈔給閱看

使英郭嵩燾奏續陳禁止鴉片事宜摺

附上諭

出使英國大臣郭嵩燾奏爲禁止鴉片煙應行事宜謹補陳數條上備採擇事竊臣光緒二年二月初八日具奏設法禁止鴉片煙一摺至今未奉批諭竊惟國家興利除弊關係重大未敢輕議整頓鴉片煙爲害中國五六十年通計各省士民陷溺其中率十之四其害日廣其毒亦日深道光十九年特詔嚴禁遂至激成海疆之禍而吸食者愈多至咸豐九年例禁已開更無顧忌臣於此時復爲禁止鴉片煙之議人皆知

其難行而臣揆之事理驗之人心顧獨以爲至易蓋使國家嚴立科條責成地方官禁之徒以擾累百姓其終必至愈禁而愈開使民人自爲禁制以獎勵其廉恥而激發其天良則動於詔旨一二言而人心自振積弊亦將自除此臣熟籌深計而決知其必然者也謹就愚見所及略具數條敬爲皇上陳之一曰權衡人情以定限制之期臣前摺議禁鴉片煙以清理學校爲先所有文武職官及舉貢士紳一例示限三年自屬一定不移之章程而其中情節實各不同有因治病吸食者有年逾五十精力已衰不能驟戒者惟當責成地方官清釐整飭萬不可搜剔窺伺及開揭告之風其紳民五十以上已至垂暮之年亦可無庸示禁蓋此次議禁之意在嚴絕其將來不在追咎其既往庶幾人心不至驚

惶即督撫大吏因病吸食亦可無憂反噬朝廷但有察覺無難處辦至於學校出身之階正本清源端在於是自府縣試互結即須以鴉片煙爲首禁應纂入學政全書萬不宜絲毫寬假此權衡人情之大端也二曰嚴禁栽種以除蔓延之害臣前摺敘述陝甘雲貴山西四川等省栽種鴉粟情形沿西數千里之地日肆蔓延而江蘇之徐州浙江之台州亦皆種植鴉粟有徐土台土之名而一皆消行內地是各省多栽一畝鴉粟即民間多增一畝之害端國家亦多廢一畝之生產非得督撫臣深體朝廷之用心切實推求斷絕根株萬不能有所裨益此嚴禁栽種之大端也三曰嚴防訛詐以除胥吏之擾朝廷明示例禁督撫下其令於州縣州縣即授其權於書差乘勢苛擾得賄包庇且有不勝言者又

自咸豐年間開鴉片煙之禁旋禁旋開又旋加禁亦復無此政體臣之愚見以爲當時開禁僅及民商官紳仍照舊禁止是今日之議禁與咸豐時之開禁用意正屬相同而一以勸戒爲義則差役之騷擾不能不先示嚴禁但有因事生風借戒煙爲名肆行訛詐應聽民人呈控交涉書差者立行嚴懲交涉地方官者亦立予嚴參總期使民間實受禁煙之利而不至虛貽禁煙之害此嚴防胥吏之大端也四曰選派紳員以重稽查之責近年廣東設立勸禁鴉片煙會臣常嘉其用心之善然出自民間私議有勸導之功而無董率之責其勢不足以振發人心應飭各省督撫臣舉派在籍公正知事體紳員一二人使專司示禁鴉片煙之責以次責成各府州縣及學官各舉派總辦一人幫辦二三人仍由